



Jens Napâtôk', Naleraq  
Inatsisartunut ilaasortaq  
inatsisartut@ina.alla.gl

## Illut sanaqataaffiusut pillugit § 37 naapertorlugu apeqquteqaammut 2022-151- imut akissut

02-08-2022  
Suliaq normu:2022 -14944  
ID. nr. 78348660

Asasara Jens Napâtôk'

Inatsisartut suleriaasianni § 37 naapertorlugu illut sanaqataaffiusut pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909  
3900 Nuuk  
Tlf.: (+299) 34 50 00  
E-mail: box909@nanoq.gl  
www.naalakkersuisut.gl

### **Apeqqut 1. Nammineerluni illulianik illulioqataanissamut attartornermut aammalu pigilernissaanut nammineerlunilu illuliornermut illulioqataanermut piumasaqaatit allangortinnissaannut Naalakkersuisut pilersaaruteqarpat**

Akissut: 2022-mut Aningaasanut Inatsisissamut isumaqatigiisummut Naalakkersuisut malitseqartitsillutik, illunut sanaqataaffiusunut aaqqiissut (95/5-aaqqiissut, isertitanullu killiliussat) nalilersortippaat. Illunut sanaqataaffiusunut akisussaaffimmik tigusinikunut, akisussaaffimmillu tigusinermikkut ataatsimoortumik tapiissutitigit tapiissutisisartunut, kommunimut paasissutissanik aallertarnissamik tamanna kinguneqarpoq.

Illunut sanaqataaffiusunut qinnuteqaatit kommunini ataasiakkaani kommunalbestyrelsit suliarisarpaat, taarsigassarsisitsinissamillu neriorsuummik tunniussisarlutik. Siuliani allassimasoq innersuussutigalugu suliassaqarfik kommuninut tunniunneqarnikummat, kommunip pigisassaannik illunik sanaqataaffiusunik, illunilluunniit sullivinnik sanaartortitsissallutik kommunalbestyrelsit aamma aalajangiisnaapput.

Taarsigassarsisitsinissamik neriorsuutit pillugit paasissutissanik kommunit tamarmiullutik tunniussinikuunngillat, taamaattumillu tamanna nalilersoruminaalluni. Taamaakkaluartoq kommuninit paasissutissanik tamakkiisunik pissarsisarnissaq suli sulissutigineqarpoq.

Saaffiginnissutinni allapputit: "... Isorliunerusuni annertuumik inissaaleqisoqarpoq...".

Akisussaaffiup, taamaalillunilu ataatsimoortumik tapiissutit Namminersorlutik Oqartussanit kommuninut tunniunneqarnerini, suli at qanitarisaannut nuunneqarnissaat ilaatigit tunngaviuvoq – kommunit kommunerisaminni inissianik pisariaqartitsinermut ilisimasaqarnerusut, taamaalillunilu pisariaqartitsinerpaaffimmi illunut sanaqataaffiusunut taarsigassarsisitsinissaasut, kommunip sanaartugassaannik namminneq sanaartorsinnaasut imaluunniit illunik sullivinnik sanaartorsinnaasut.

Konto pingaarnermi 80.00.01 Nuussinissamut sillimmatini aamma allassimavoq, ataatsimoortumik tapiissutit siunertassaminnut atorneqarsimasut kommunit qinnuteqartut uppersarsinnaappassuk, illunut sanaqataaffiusunut tapiiffigineqareersut

qaavatigut tallimanik tapiiffigineqarsinnaasut. Kommunit arlaannaalluunniit qaavatigut aningaasanik qinnuteqarnikuunngilaq.

Saaffiginnissutinni allapputit: " Ineqarfiusut ullutsinnut naleqqutinngillat aammalu aserfallassimaqalutik". Tassunga tunngatillugu oqaatigissavara, iluarsartuussinerit, pitsanngorsaanerit, illunillu pioreersunik alliliinerni tamakkiisumik aningaasartuutit 40 %-iinik – annerpaamilli 300.000 koruuninik taarsigassarsisisinnaasunit, illuutillit nutarterinissaminnut kommunerisaminni kommunalbestyrelsimit taarsigassarsitinneqarnissaminnik qinnuteqarsinnaammata. Akisussaaffik tamanna kommuninut aamma tunniunneqarnikuuvoq, kommunillu ukiumut ataatsimoortumik tapiissutinik pissarsissutigisarlugu.

Nunaqarfinni isorliunerusunilu inissianik pilersorneq pitsaanerulersinneqassasoq Naalackersuisut kissaatigaat. Illuliortiternermut tunngatillugu ataatsimoortumik tapiissutit qaffanneqarnissaannik borgmesterit siorna kissaateqarput. Nunaqarfinni isorliunerusunilu illuliortiterneq annertusineqassasoq Inatsisartuni partiiniit amerlanerussuteqarluartuniit aamma kissaatigineqarnikuuvoq.

Taakkua tunngavigalugit pingaartumik ilaqtariit inuusuttut appasissumik isertitalit ukkataralugit illuliortiternermut aningaasalersueriatsit ilaatigut misissorneqassasut, 2022-mut aningaasanut inatsisissap isumaqatigiissutigineqarnerani isumaqatigiissutigineqarpoq, illunullu sanaqateqaaffiusunut aaqqiissut allannngortinneqassasoq aamma kissaatigineqarluni.

Taamaalilluni illuliortiternernut aningaasalersuineq, pingaartumillu illunut sanaqataaaffiusunut inatsit pillugu aaqqiissutit assigiinngitsut nalilersussallugit allaffeqarfiga peqquneqarpoq. Tassunga tunngatillugu illuliortiternernut tunngatillugu kommunit siumut neriorsuutaat pillugit, taarsigassarsisisimanerinnullu tunngatillugu paasissutissanik allaffeqarfiga 2022-mi februaarimili ujartuilerpoq.

Allaffeqarfimma paasitippaanga, Kommuneqarfik Kujalleq paasissutissanik nassitsisimasoq. Paasissutissat qinnutigineqartut ilaat Kommune Qeqertaliup nassiussimagai. Qeqqata Kommuniata paasissutissat nassiussimavai. Taamaalilluni Avannaata Kommunia kiisalu Kommuneqarfik Sermersooq paasissutissanik naammaginarturnik nassitsisimangillat, kommunillu taakkua kattullugit tassaallutik Nunaqarfinnut Isorliunerusunullu Inissialiortiternermut Pilersaarummut, tapersiissutitalimmik inissialiortiternermut, namminersortullu inissialiortiterninut tamakkiisumik tapiissutinik affaat sinnerlugit pissarsisartut.

Suliassaqarfimmut kommunimut tunniunneqarsimasumut tunngatillugu aningaasanik amerlanerusunik immikkoortitsisoqarnissaannik kommunit kissaateqartillugit, suliassaqarfimmut immikkoortinneqarsimallutik ataatsimoortumik tapiissutaasimasut qanoq atorsimanerlugit kommunit nalunaaruteqarsinnaassasut aamma inissaminiissoraara.

Aaqqiissutit nalilersorsinnaaqqullugit, paasissutissat pisariaqartinneqartut kommunit nassiuttariaqarpat.

Kommune Qeqertalimmi najukkani innuttaasunik ataatsimiisitseqqammerpunga, nutarterinissamullu taarsigassarsitinneqarnissamik innuttaasut kommuninut qinnuteqarsinnaanerit ilaatigut paasissutissiissutigalugu. Aggustip naanerani

Avannaata Kommunionukartussaavunga, nutarterinissamullu kommunimut qinnuteqarsinnaanerini innuttaasut ilaatigut aamma paasissutissittussaallugit.

**Apeqquut 1a. Nammineerluni akiliummut malittarisassat (nammineerluni akiliut) nammineerluni illulianik illulioqataanermik sanaartornermi attartukkat aammalu pigilernissaanut malittarisassat allangortinneqarpata pisortanut tamanna qanoq akeqassava? Qinnuteqartoq illoqutigiit isertitaat akileraaruteqaataasusaaq 600.000 kr. ataallugit annertussuseqarpata nammineerluni akiliut 5% akilersinnaassallugu.**

Akissut: Apeqquutip akinissaanut illunut sanaqataaffiusunut taarsigassarsiat pillugit Inatsisartut inatsisaat nr. 28, 3. december 2018-imeersumi § 10-mut nassuiaatit innersuussutigaaqka. Tassannga tabeli tigulaagaq aana:

Isertitat kr.	Taarsigassarsiat %	Taarsigassarsiat kr.	Nammineerluni akiligassat %
300.000	95,00%	1.900.000	5,00%
350.000	86,50%	1.730.000	13,50%
400.000	78,00%	1.560.000	22,00%
450.000	69,50%	1.390.000	30,50%
500.000	61,00%	1.220.000	39,00%
550.000	52,50%	1.050.000	47,50%
600.000	44,00%	880.000	56,00%

\* Taarsigassarsiasat sanaartornermut aningaasartuutit taarsigassarsititsiviusinnaasut 2 mio. koruuninut missiliorneqartut tunngavigalugit naatsorsugaapput.

Inoqutigiinnut 300.000 koruuninik, 600.000 koruuninillu isertitalinnut taarsigassarsisutit illumut ataatsimut nikingassutaa 1.020.000 koruuninut naatsorsorneqarsinnaavoq.

**Apeqquut 1b – Qinnuteqartoq illoqutigiit isertitaat akileraaruteqaataasusaaq 600.000-700.000 kr. qaangerlugit annertussuseqarpata nammineerluni akiliut 10%% akilersinnaassallugu.**

Akissut: Ullumikkut inoqutigiit 600.000 koruunit sinnerlugit isertitalit illunut sanaqataaffiusunut aningaasartuutissat tamakkerlugit akilissavaat (tamakkiisumik nammineq akiliutissat) imaluunniit illulioriternernut aningaasalersuineq aqutugalugu 880.000 koruuninik taarsigassarsisitsisoqarsinnaalluni, taarsigassarsitinneqarnissaminnik qinnuteqarsinnaapput. Tamanna § 10-mut nassuiaatini aamma allassimavoq.

Sanaartornermi aningaasartuutinit 2 mio. koruuniusunit inoqutigiit 10 %-inik akiliuteqassappata, inoqutigiit 200.000 koruunit namminneq akiliutigissavaat, pisortallu 1.800.000 koruuninik taarsigassarsisitsillutik.

**Apeqquut 1c - Qinnuteqartoq illoqutigiit isertitaat akileraaruteqaataasusaaq 700.000-800.000 kr. qaangerlugit annertussuseqarpata nammineerluni akiliut 10% akilersinnaassallugu.**



Akissut: Sanaartornermi aningaasartuutinit 2 mio. koruuniusunit inoqutigiit 15 %-inik akiliuteqassappata, inoqutigiit 300.000 koruunit namminneq akiliutigissavaat, pisortallu 1.700.000 koruuninik taarsigassarsisitsillutik.

**Apeqquut 1d - Qinnuteqartoq illoqutigiit isertitaat akileraaruteqaataasusseq 800.000-900.000 kr. qaangerlugit annertussuseqarpata nammineerluni akiliut 20% akilersinnaassallugu.**

Akissut: Sanaartornermi aningaasartuutinit 2 mio. koruuniusunit inoqutigiit 20 %-inik akiliuteqassappata, inoqutigiit 400.000 koruunit namminneq akiliutigissavaat, pisortallu 1.600.000 koruuninik taarsigassarsisitsillutik.

**Apeqquut 1e - Qinnuteqartoq illoqutigiit isertitaat akileraaruteqaataasusseq 900.000-1.000.000 kr. qaangerlugit annertussuseqarpata nammineerluni akiliut 25% akilersinnaassallugu.**

Akissut: Sanaartornermi aningaasartuutinit 2 mio. koruuniusunit inoqutigiit 25 %-inik akiliuteqassappata, inoqutigiit 500.000 koruunit namminneq akiliutigissavaat, pisortallu 1.500.000 koruuninik taarsigassarsisitsillutik.

**Apeqquut 1f - Qinnuteqartoq illoqutigiit isertitaat akileraaruteqaataasusseq 1.00.000 kr. qaangerlugit annertussuseqarpata nammineerluni akiliut 30% akilersinnaassallugu.**

Akissut: Sanaartornermi aningaasartuutinit 2 mio. koruuniusunit inoqutigiit 30 %-inik akiliuteqassappata, inoqutigiit 600.000 koruunit namminneq akiliutigissavaat, pisortallu 1.400.000 koruuninik taarsigassarsisitsillutik.

Neriuppunga qulaani allaqqasuni apeqquuteqaatitit akineqartut.

Inussiarnersumik inuulluaqqusillunga



Erik Jensen